



Fasnacht 2006

Basler Bebbi Basel Alti Garde

Deutschland, wir helfen dir: Zauberformle für dr grooss Kanton!

Oh Merkeli oh Merkeli,
du machsch de Dütsche Sergeli.
Chaos prägt die deutschen Landen,
Wirtschaftsaufschwung kommt abhanden,
d Arbetsloosezahle schtyyge,
dr Schtaat muess neuu Schulde byyge,
s Bruttosozialproduggt
schpiilt syt langem scho verruggt,
ob ohni oder mit **Hartz vier**,
die Dütsche, die sin knocheschtier.

D Zyt für e Frau wär ändlig doo,
... und troztdäm hän sy d **Merkel** gnoh.
Doch die haut alli dütsche Manne
ohni z zögere in d Pfanne.
Ändlig derf die friehneri **Ossi**
für Oscht- und Weschtdütschland dr Boss sy.
(Ganz konschterniert sait d Tante Schuggi,
sii haig am liebschte Ossi bucci.)

Y waiss halt nit ganz, was das söll,
us Schutt macht d Merkel aifach Gröll.
Wenn d Angela kunnt und d Ärde beebt,
denn merggsch es gly, die Wüste lebt.
Was, d Merkel haig sich schtargg verschönt?
Dasch falsch, me het sich nur dra gwöhnt.

Schwarz-Rot isch jetz z Dütschland Trumpf,
doch baidi schtegge dief im Sumpf,
der unionsgeschwärzte **Michel**
trägt zum **Kreuz** jetzt **Hammer-Sichel**.
Regiert wird ohni Weschterwelle,
will dä haig als wie feschter welle.
Doch au die Kombination wurd schyttere,
drum dien mir eure Horizont erwytttere.
Mir Schwyzer löhn euch nit im Schilf,
jetzt laische mir Entwiggligshilf
und bringe euch im Sauseschritt
unseri **Zauberformle** mit.

Was unseri Schwyz nimm bruuche duet,
das isch für euch no lengschters guet.
Die **Zauberformle** bringt by Kenner
Fründ und Find uf dr glychi Nenner,
d Aggressioone wärde dämpft,
s wird nur no pläuderlet schtatt kämpft.
Mit fuule Kompromiss, dasch wichtig,
machsch wenig falsch und fascht nüt richtig.
So Kompromiss gits ohni Änd,
dasch **Zauber made in Switzerland**.

Ohni Hilf sctoht Dütschland scho lang
politisch vor em Untergang.
Schtatt dr Bush in dr Luft z verrupfe,
duet em d Merkel hinde yyne schlupfe.
Au mit de Finanze hän sy s Gryz,
s Schwarzgäld liggt alles in dr Schwyz,
und sogar dr Wortschatz isch nit so gschiggt,
schtatt Benefiz gits numme no **Benedikt**.
Au s gaischtig Dief isch nit ganz ohni,
saisch **Pisa**, dänggt jede an quattro staggioni.
Bym Fuessball ischs die glychi Gfoor,
doch die Kataschtroophe sctoht no bevor.
D Frau Merkel und dr **Oli Kahn**
die ghööre uf e Gaischterbahn.

Us däm Material formt me s Kabinett,
... jä jä, me nimmt halt das, was het ...
Denk ich an Deutschland in der Nacht,
so werd ich um den Schlaf gebracht.

Halt, machet e Punggt, ihr liebe Germaane,
mit Klööne elai kunsch niene aane.
Bevor ihr sy dur dr Gaggo ziehnt:
S het jede die Regierig, woner verdient.

Wie d Zauberformle richtig goht,
das gsehn dr by unserem Bundesroot,
dä het sich hinter d Ohre gschriibe:
3 x 2 + 1 = 7
Dr Blocher sait, die Formle, glaub er,
syg in erschter Linie fuule Zauber.
Konkordanz syg nur e Gwinn,
wenn alli synere Mainig sin.
Do frogt dr **Couchepin**, sage mir,
Concordance, quesqu' ça veut dire?
Dr **Merz**, dä findet d Konkordanze
überflüssig by Finanze,
d Frau **Calmy-Rey**, die sait im Scherz,
dr schlimmeri **Blocher** syg dr Merz.
Dr **Schmid** sait: wenn ych s nur erläbti,
ass es die Zauberformle nimm gäbti,
ohni die Formle wärs e Hit,
drum: **Ab nach Dütschland, furt drmit!**

Die Formle git de Dütsche Kraft
und macht d Frau Merkel **zauberhaft**.
Jetz ka die neuu Bundeskanzler
de andere uf dr Naase danzler.
Simsalabum und **simsalabim**,
scho gits Oppositione nimm.
Abakadabra, ai Bligg in ihr Gsicht,
und scho fühlsh dy wie bym jüngschte Gricht.
Hokus pokus fidibus,
dr Schröder, dä isch lengschters duss,
und ains, zwai, drey, das het no gfählt,
wird **Stoiber** zem Unwort des Jahres gwählt,
d CSU macht us däm Schtotterli
e bayrischs Mini-Harry-Potterli.

Eso hän mir Schwyzer d Wooge glettet
und mit dr Zauberformle Dütschland grettet.
Und s näggscht Joor exportiere mr, wenn s goht,
au no dr gesamti Bundesroot.

Zum Schluss gib y zue, es macht mr Fraid,
y ha de Dütsche nit aimool **Schwoobe** gsait,
denn schliesslig wurd ychs au nit vertraage,
wenn me jedem Schwyzer wurd **Zürcher** saage.

Sofärn mr nit grad Entwiggligshilf z Dütschland laische, kasch unseri Ladärne vom
Fasnachtsmäntig zoobe bis am Mittwoch demorge uf em Münschterplatz bewundere.

Druck: Thoma AG, Basel